

Roman Urdu



HAZRAT ISA AL-MASIH KA DOBARA ZINDA
HONA

HAZRAT ISA AL-MASIH KA DOBARA ZINDA HONA

Hazrat Isa Al-Maseeh hamare gunaahon ke liye masloob hue. Lekin woh murda na rahe. Asal mein, Hazrat Isa Al-Maseeh aaj bhi zinda hain. Woh aasman mein, Allah Ta'ala ke paas baithe hain aur us din ka intezaar kar rahe hain jab woh wapas aayeinge aur tamaam duniya ka hisaabo kitaab leinge.

Socho, agar hum Allah ki huzoori mein jaana chahte hain, to wohi humein le ja sakta hai jo pehle se wahan baitha ho.

Aaj main aap ko ek waqia sunane wala hoon — yeh Hazrat Isa Al-Maseeh ke dobara zinda hone ka waqia hai. Yeh Injeel Shareef mein Matti 28 mein likha hai.

Hazrat Isa Al-Maseeh itne taaqatwar hain ke marne ke baad bhi phir se zinda ho gaye, aur apni qabr se bahar nikle.

Dekhein, duniya mein na jaane kitni qabrein hain, aur un mein auliya bhi dafn hain. Lekin Hazrat Isa Al-Maseeh ki qabr khaali hai.

Aaiye, hum Matti 28 ko parhte hain:

Itwaar ko subah sawere hi Maryam Magdleen aur doosri Maryam qabr ko dekhne ke liye niklein. Sooraj tulu ho raha tha.

Achanak ek shadeed zalzala aaya, kyunki Rab ka ek farishta aasman se utar aaya aur qabr ke paas ja kar us par pade patthar ko ek taraf ludhka diya. Phir woh us par baith gaya.

Us ki shaklo soorat bijli ki tarah chamak rahi thi aur us ka libaas barf ki maanind safed tha. Pehredar itne dar gaye ke woh larazte larazte murda se ho gaye.

Farishtay ne khawateen se kaha, “Mat daro. Mujhe maloom hai ke tum Isa ko dhoond rahi ho jo masloob hua tha.

Woh yahan nahin hai. Woh ji utha hai, jis tarah us ne farmaya tha. Aao, us jagah ko khud dekh lo jahan woh pada tha.

Aur ab jaldi se ja kar us ke shagirdon ko bata do ke woh ji utha hai aur tumhare aage aage Galeel pahunchega. Wahin tum use dekhoge. Ab main ne tum ko is se aagah kiya hai.”

Khawateen jaldi se qabr se chali gayin. Woh sehmi hui lekin badi khush thin aur daudi daudi us ke shagirdon ko yeh khabar sunane gayin.

Achanak Isa un se mila. Us ne kaha, “Salaam.” Woh us ke paas aayin, us ke paon pakde aur use sijda kiya.

Isa ne un se kaha, “Mat daro. Jao, mere bhaiyon ko bata do ke woh Galeel ko chale jaayein. Wahan woh mujhe dekheinge.”

Is waqia se humein chaar badi sachchaiyan milti hain:

Pehli sachchai: Hazrat Isa Al-Maseeh maut ko hara kar murdon mein se ji uthe! Teen din

baad, un par imaan rakhne wali auratein un ki qabr par gayin. Woh rone gayi thin. Lekin wahan unhein Hazrat Isa Al-Maseeh zinda mile! Lekin Hazrat Isa Al-Maseeh maut se bhi zyada taaqatwar hain. Is liye woh humein hamesha ki zindagi yani jannat mein hamesha ki zindagi de sakte hain.

Doosri sachchai: Farishta un ki zindagi ki khabar dene aaya. Jaise jab woh paida hue the to farishton ne logon ko khushkhabri di thi, waise hi ab un ki qabr par bhi farishta utra. Allah Ta'ala chahta tha ke sab ko maloom ho jaaye ke Hazrat Isa Al-Maseeh ne maut par fatah yani jeet hasil kar li hai. Aaj bhi agar koi hamesha ki zindagi chahta hai, to us ko chahiye ke apne gunaahon se tauba kare aur Hazrat Isa Al-Maseeh par imaan laaye.

Teesri sachchai: Hazrat Isa Al-Maseeh ne wada kiya tha ke un ke shagird unhein dekheinge. Aur sach much unhon ne dekha! Galeel mein pahaad par, gyaarah shagird un ke saamne aaye aur unhon ne unhein sijda kiya. Sirf shagird hi nahin, balkeh 500 se zyada logon ne unhein apni aankhon se zinda dekha. Itne logon ne gawaahi di hai ke aaj humein poora yaqeen hai — un ka dobara zinda hona sach aur haqeeqat hai.

Chauthi sachchai: Logon ne Hazrat Isa Al-Maseeh ki ibaadat ki. Auraton ne bhi sijda kiya. Shagirdon ne bhi sijda kiya. Un ki paidaish par poorab se najoomi log aaye aur unhon ne sijda kiya. Toofaan thama to shagird bole: "Yaqeenan, aap Allah ke bete hain." Is ka matlab yeh nahin ke woh Allah ke jismani bete the — balkeh roohani bete the, yani Allah se khaas rishte wale.

Mere azeezo,

Hazrat Isa Al-Maseeh ka maqam ek nabi se barh kar hai. Woh kunwari aurat se paida hue. Unhon ne langde ko theek kiya. Andhe ko roshni di. Murde ko zinda kiya. Aur sab se aham, unhon ne apni jaan hamare gunaahon ki qurbani ke liye di. Woh dafn hue. Lekin phir se zinda ho gaye. Hazrat Isa Al-Maseeh waqai ibaadat ke laiq hain.

Meri umeed hai ke aap ne in baaton se un ki azmat ko pehchana hoga. Agar haan, to woh aaj aap ko bula rahe hain — tauba karein, imaan laayein, aur un ke shagird ban jaayein.

Agli taleemaat hongii — Hazrat Isa Al-Maseeh ke aath ahkaam ke mauzu par hogi.

Aage zaroor parhte rahiye.

Hamse Jurhne ke liye Icons par click karen.....

